



BOSANSKOPETROVAČKI VJESNIK

Mjesečnik Općine Bosanski Petrovac

Uređuje: Kabinet Općinskog načelnika, tel.: 037/883-570 i 037/883/571, fax: 037/881-012, e-mail: opcina@bih.net.ba

Glas Načelnika

BOŠKO SE ZAPOSLO U SVOJOJ „FANI“!



Dragi sugrađani,

Izuzetno dobru vijest objavujemo u ovom broju: „Fana Arifagić“ primila je 9. juna u radni odnos prvog radnika! To je Boško Repac, povratnik u Krnjeušu, i povratnik u svoju „Fanu“, u kojoj je radio prije rata. „Fana“ je nekada proizvodila kvalitetan namještaj, koji se i izvezio, a ubuduće će ovdje biti farma crvenih norveških krava, čije će mlijeko i mliječni proizvodi kvalitetom zasigurno biti i za izvoz!

Jusuf Arifagić, Kozarčanin, i sve češće Petrovčanin, već mjesecima sijenom sa petrovačkih medenih polja hrani svoje krave na farmi u Kozarcu: zahvaljujući ovako zdravoj i bogatoj ishrani, sada daju nekih 15% više mlijeka nego ranije! Jest da „spavaju na udobnim prostirkama, hodaju po lateks spužvama, slušaju klasičnu muziku i sevdalinke...“ – kako ih često predstavljaju u bh. medijima – ali počele su davati osjetno više mlijeka tek kada im je u jelovniku serviran petrovački specijalitet!

Bale sijena koje Arifagić odvozi u Kozarac potiču i sa krnjeuških pašnjaka: kupuje ih od susjeda, koji sijeno dovoze na zbirno mjesto, upravo u „Fanu“. ...Koliko li će Krnjeušanima biti isplativije, kada ne budu kosili i dovozili sijeno u „Fanu“, nego kada budu „Fani“ prodali, ili iznajmili, svoje livade! Kako je krenulo, mogao bi se u Krnjeuši razviti sistem zapošljavanja „pred kućnim vratima“!

Da, poslije Boška, još se jedan njegov komšija zaposlio u „Fani“. Kako? Lako: „Dobio sam pismo tog čovjeka, u kojem kaže da ima potrebu da se zaposli, i da je spreman raditi šta god zatreba u ‘Fani’! Osjetim da je čovjek iskren i čestit, i primim ga! Čestitost je uvjet

koji će morati zadovoljiti svaki radnik ‘Fane’! – kaže gospodin Arifagić.

Moglo bi se još govoriti o ekonomskim i kvalitativnim vrijednostima koje donosi „Fana Arifagić“, ali sve bi se vrtilo oko, i sve bi se svelo na najvažnije, na gruntovno: na medne petrovačke pašnjake! Bogati i prebogati, razasrti od Bravskog do Bjelajsko-Vrtočko-Krnjeuškog polja, pašnjaci i livade predstavljaju, za plansko domaćinsko korišćenje, neiscrpnii izvor zdrave zelene privrede, jednako kao i bogate petrovačke šume.

„Fana Arifagić“ će, kada krave prestanu davati dovoljno mlijeka, vjerovatno početi sa proizvodnjom i preradom mesa, što će reći s novim radnim mjestima.

Gruntovno dobro posjeduje svako naše seosko domaćinstvo. Sa malo truda, svi mogu razviti široku mrežu samoodrživih poljoprivrednih, stočarskih, drvoprerađivačkih farmi i firmi, za što će imati punu podršku Općine.

Za koju sedmicu završavaju se radovi na adaptiranju „Noviteta“, za radne novitete: za proizvodnju finog rublja popularnog proizvođača „Alma Ras“ i za tržišni centar najvećeg bh. trgovačkog lanca „Bingo“, u kojem će biti od „igle i lokomotive“ do restorana i dječje igraonice! – sve sa novim radnim mjestima!

Nova radna mjesta planira i kolunička firma Pirnar, koja proizvodi vrata za evropsko, japansko i nigerijsko tržište, i koja danas zapošljava nekih 80 radnika: „U toku su aktivnosti oko kupovine građevinskog zemljišta u nekoj od industrijskih zona na području Općine, na kojem ćemo izgraditi nove proizvodne kapacitete i u narednih pet godina broj zaposlenih povećati za 100 posto!“ – najavljuje direktor Sandi Terzić.

Na njega se „nadovezuje“ beogradski „Blic“:

„Proizvodnja stakla za aluminijska vrata dovela je Igora Šarića iz Prijedora u Bosanski Petrovac. Dobri uslovi slovenačke firme bili su razlog da se iz grada na Sani preseli u šumske krajeve zapadne Krajine. ‘U Petrovac sam došao za poslom, zato što je firma došla iz Slovenije, u kojoj sam prije radio.’, kazao je Šarić. Iz istih razloga i dvojica Igorovih kolega su se preselili iz Gradiške.“ – piše beogradski „Blic“, pod naslovom „Privredni bum u Bosanskom Petrovcu: Ekonomija važnija od nacionalizma“!

...Posla ima i biće: samo nam valja zasukati rukave!

Srdačno,

Zlatko Hujčić

57. Olimpijada mladih matematičara ODE ADISA PREDSTAVLJATI RODNI GRAD I DRŽAVU!

Nakon što joj je na Dan Općine, 25. maja, odala priznanje Zahvalnicom, naša Općina nastavlja motivirati i podržavati svoju zlatnu matematičarku Adisu Bolić: dodijelila joj 3.000 KM, kako bi mogla učestvovati na „57. Olimpijadi mladih matematičara“ u Hong-Kongu. Tamo će, uspješno kao do sada, predstavljati svoj grad i državu, sa vršnjakinjom Tijanom Babić iz Banjaluke i sa Amarom Kurićem, Neirom Kurtović, Zlatkom Salkom Lagumdžijom i Eminom Mrkonjom, iz Sarajeva. Sa njima su i mentori Jelena Radović, sa Filozofskog fakulteta na Palama i Sead Delalić, sa Prirodno-matematičkog fakulteta u Sarajevu.

Općina je i ranije pomagala Adisine nastupe na svjetskim, evropskim i balkanskim takmičenjima, što je Adisa uzvraćala najsjajnijim odličjima! Posljednji primjer takvog međusobnog povjerenja potvrđen je u aprilu, kada je Adisa donijela zlatnu medalju sa Evropske matematičke olimpijade, koja je održana u Rumuniji. Naša matematičarka tako postaje sve čvršća karika u lancu nadarenih Petrovčana – nekad pisaca i slikara, danas matematičara, naučnika i informatičara poput braće Ferizović i Sulje Linića.

Općinski načelnik Zlatko Hujčić je istakao kako će općinska administracija uvijek naći načina da pomogne svoje talente, i da nikad neće dopustiti da njihovi uspjesi zavise od milosti i nemilosti viših nivoa vlasti:

„Naša Adisa je naš ponos i primjer pozitivne slike grada u kojoj se rađaju i žive pametni i uspješni ljudi! Adisina Općina će uvijek biti uz nju, a pomažući njen rad mi šaljemo poruku i drugoj djeci da iskažu svoj talent, da ga koriste, a Općina će biti tu da ih pomogne!“

Slušajte Radio Bosanski Petrovac od 15:00-17:00, svakim danom na 90.9 MHz fm

Razmatrani brojni izvještaji i informacije, donesene odgovarajuće odluke i zaključci

Pravilnika o radnim odnosima" u Centru za kulturu i obrazovanje.

Usvojene su i sljedeće odluke: a) Odluka o izmjenama i dopunama Odluke o opštinskim administrativnim taksama; b) Odluka o ponovnom provođenju izbora za članove savjeta MZ Kapljuh i Bravsko; c) Odluka o načinima i uslovima raspolaganja nekretnina u vlasništvu Opštine, koje se nalaze u k.o. Petrovac grad (ulica Ibrahimpašića i Avnojska); d) Odluka o dopunama i izmjenama Odluke o uslovima, obimu i načinu stipendiranja redovnih studenata za akademsku 2015/2016. godinu; e) „Odluka o izmjeni i dopuni Odluke o komunalnim taksama i tarifi komunalnih taksa“.

Odluka o visini naknade za učenika generacije OŠ „Ahmet Hromadžić“ vraćena je obrađivaču na doradu, nakon obraćanja roditelja, Elme Terzić, i komentara vijećnika.

Potrebnu većinu glasova vijećnika nije dobila tačka o „Donošenju stava OV o prijedlogu zakona o značajnim datumima, događajima i ličnostima u toku odbrambeno-oslobodilačkog rata na području USK, Ministarstva za pitanje boraca i ratnih vojnih invalida“ i tačka „Upoznavanje članova OV sa Prigovorom OOSDA na postupak izbora i imenovanja Slobodanke Kecman za člana predsjednika Opštinske izborne komisije“.



Održana 41. redovna sjednica Općinskog vijeća

Rutinska sjednica bogatog sadržaja

Redovna sjednice Općinskog vijeća, održana 26. juna, bila je posvećena razmatranju i usvajanju tekućih izvještaja, informacija, odluka, zaključaka... U početku, kao obično, usvojeni su izvodi iz zapisnika prethodnih sjednica (40. redovne i devete vanredne sjednice) i razmatrana su vijećnička pitanja.

Vijećnici su usvojili nekoliko izvještaja: a) Izvještaj komisije opštinskog Načelnika o procijenjenoj visini sredstava za obnovu spomenika u skladu sa Zaključkom Vijeća od 27. aprila; b) Izvještaj o stanju u komunalnoj djelatnosti (problemi infrastrukture, snabdjevanje stanovništva vodom i stanje vodoopskrbnih objekata); c) Izvještaj o radu Općinskog pravobranilaštva (za koji je zaključeno da se ubuduće podnosi jednom godišnje); d) Izvještaj o radu komisija Općinskog vijeća za za prvo polugodište 2016.

Primljene su k znanju, kako se to pravno kaže, sljedeće informacije: a) „Informacija o stanju u oblasti kulture“, koju je predstavila Milica Kecman, direktorica Centra za kulturu i obrazovanje; b) „Informacija o porastu nasilja u porodici na području Općine“ c) „Informacija o radu humanitarne organizacije Crvenog križa/krsta“; d) „Informacija o započetim i završenim projektima u Općini u 2016. godini“.

Što se tiče „Informacije o implementaciji Odluke o postupku, uslovima i načinu legalizacije bespravno izgrađenih građevina na području Općine“, zadužen je općinski Načelnik da po hitnom postupku riješi problem garaža u Skenderovom naselju i da obezbijedi normative, kako bi se sva izgradnja na području Općine vršila na propisan način.

Donesen je i „Zaključak o davanju saglasnosti na Pravilnik o izmjenama i dopunama

„Fana Arifagić“ počela sa zapošljavanjem...

Prvi ugovor o radu potpisan sa Boškom Repcom, povratnikom u Krnjeušu, radnikom nekadašnje fabrike namještaja „Fana“

Kako je i najavljeno prilikom potpisivanja ugovora o kupoprodaji nekadašnje tvornice „Fana“, 23. maja, juni protiče u znaku aktivnosti na prenamjeni i oživljavanju ovog krnjeušskog preduzeća, koje je otkupila firma „Arifagić Investment“, iz Kozarca. Proizvodne hale nekadašnje drvne industrije biće preuređene za stočarski uzgoj i proizvodnju. Biće tu farma za uzgoj prvoklasnih bikova i rasplodnih junica, te pogon za proizvodnju koncentrovane stočne hrane, za potrebe bh. tržišta i okolnih zemalja.

Neposredno po potpisivanju ugovora, otpočeli su pripremni radovi, pa je prvi zaposlenik već 9. juna primljen u radni odnos. Tu sreću je imao Boško Repac, povratnik u Krnjeušu, nekadašnji radnik predratne „Fane“. Nakon skromne prigodne svečanosti, u kabinetu općinskog načelnika, gdje je potpisan ugovor o zaposlenju, Repac nam je rekao kako je zadovoljan uslovima koje mu je pružila novoosnovana firma „Fana Arifagić“ i kako

je sretan što će firma u kojoj je nekad radio oživjeti i dobiti novu svrhu. Prema njegovim riječima, trenutno su u toku radovi na osposobljavanju teško oštećenih elektroinstalacija, zatim radovi na osiguranju kvalitetnog vodosnabdjevanja budućeg pogona i farme, te radovi na čišćenju i uređenju objekta za smještaj goveda.

Vlasnik firme „Fana Arifagić“, Jusuf Arifagić, potvrdio nam je takođe da se intenzivno radi na osposobljavanju kapaciteta buduće farme, te da se stvaraju uslovi za preseljenje prvog kontigenta krava. Ukoliko sve bude teklo prema planu, prva grla će uskoro biti dopremljena u Krnjeušu. Tim povodom biće upriličeno svečano otvaranje kojem će, očekuje se, prisustvovati veliki broj važnih gostiju, uključujući ambasadore Norveške i Švedske, te visokog predstavnika Valentina Inzka.

Arifagić ističe kako će se u narednim danima i sedmicama nastaviti sa zapošljavanjem prvih

radnika koji će biti angažovani za rad na farmi, a da će daljnji trend zapošljavanja pratiti aktivnosti na jesenjoj sjetvi, te na skorom pokretanju mješaonice stočne hrane. Smatra da je široka perspektiva stočarstva na području naše općine, pa bi „Fana Arifagić“ mogla ovdje udariti temelje budućim pogonima za proizvodnju i preradu mlijeka i mesa.



Svi zadovoljni prvim ugovorom o zapošljavanju; s desna: Jusuf Arifagić, Zlatko Hujčić, Boško Repac

Predramazanski prijem kod Općinskog načelnika

U povodu početka Ramazana, načelnik Zlatko Hujčić priredio je, 3. juna, tradicionalni prijem za predstavnike Islamske zajednice u našem gradu, predvođene Mirzetom ef. Spahićem, glavnim imamom Medžlisa. Prijemu su prisustvovali predstavnici petrovačkih džemata.

„Ramazanski prijem predstavlja najbolju priliku da porazgovaramo o o potrebama džemata i o aktualnim pitanjima koja se tiču rada Islamske zajednice, posebno sada

kada dolazi mjesec Ramazan. Poželio sam da im i ovogodišnji post bude olakšan, njima prisutnima i svim postačima u našem gradu.“ – rekao je načelnik Hujčić.

Tokom razgovora predstavljen je plan ramazanskih aktivnosti koje će se odvijati tokom mjeseca posta, kao i bajramska svečanost koja će obilježiti krajem ovog mubarek mjeseca.

Predstavnici Islamske zajednice zahvalili su se načelniku na prijemu, ističući primjernu saradnju Općine i institucija IZ, koja je od izuzetne važnosti u našoj istinski multietničkoj sredini.



S lijeva na desno: Edin Mehić, Alem Jaganjac, Halid Bobić, Mirzet Spahić, načelnik Općine

Prvi vaskršnji sabor petrovačke omladine

Prigodne kulturno-sportske manifestacije održane pokraj Hrama Uspenija Presvete Bogorodice, u Vođenici

Vjeroučitelji pravoslavne vjeronauke i petrovačka omladina organizovali su Prvi vaskršnji sabor omladine u našoj Opštini: ova značajna kulturno-sportska manifestacija održana je 4. juna, kod hrama Uspenija Presvete Bogorodice u Vođenici. Saborovanje je počelo vjerskim obredom Bogoslužnja, koje je služio Nikola Arkula, administrator Parohije krnjeuško-vođeničke.

Nakon bogoslužnja, uslijedilo je druženje uz pjesmu, igru i nadmetanje u tradicionalnim seoskim sportskim disciplinama. Učenici MŠŠ „Bosanski Petrovac“, te učenici osnovnih škola iz „Ahmet Hromadžić“ i „Drinić“ takmičili su se u malom fudbalu i u nekim pomalo zaboravljenim igrama: nošenje jajeta u kašikama, skok u dalj, trka u džakovima, bacanje kamena sa ramena, kličak, navlačenje konopca...

Najuspješniji takmičari u disciplini nošenja jajeta u kašikama bili su Nemanja Stupar, učenik drugog razreda MŠC i sestre Sara i Lara Erceg, učenice OŠ u Krnjeuši. Sestre Erceg su osvojile još dvije medalje, zlatnu i bronzanu, u disciplini trka u džakovima, dok je druga bila Ivana Škrbić, također iz Krnjeuše. U skoku u dalj prvi je bio Nikola Marjanović, drugi Nikola Kalanj, a treći Dragan Kerkez, svi učenici MŠŠ.

Veoma interesantna bila je i disciplina „kličak“ (dva dječaka vuku granu, nastojeći jedan drugoga privući na svoju stranu). Najuspješniji je bio Dragan Kecman, drugi Voislav Grubiša, dok je treće mjesto osvojio Ranko Šarac, svi maturanti MŠC. Njih trojica i njihovi vršnjaci iz iste škole, Milorad Ivanić i Nikola Kalanj, sačinjavali su ekipu „Vukovi“, koja je osvojila zlatni pehar u disciplini navlačenja konopca. Drugi su bili momci iz ekipe „Krnjeuša“, a treći ekipa „Smoljana-veliki“.

Za medalje su se borile i četiri ekipe djevojaka. Najuspješnije su bile djevojke iz ekipe „Rusija“, pobjeđivši školske kolegice iz MŠC „Kraljice“ (iako je „Njeno visočanstvo“ bilo pojačano prošlogodišnjim maturanticama).

Najbolji u bacanju kamena sa ramena bio je Voislav Grubiša, drugi Nikola Kalanj, a treći Milorad Ivanić. Za pokazanu hrabrost u nadmetanju u viteškim disciplinama posebnom diplomom nagrađen je bosanskopetrovački osnovac Zoran Mandić, učenik OŠ „Ahmet Hromadžić“.

U nastavku saborovanja održan je turnir u malom fudbalu, sa 6 ekipa. Zlatni pehar osvojili su „Nemanjići“, momci iz gradskog jezgra. Drugi su bili fudbaleri „Radničkog-Krnjeuša“, treći članovi „Pitagore“, MŠC. Vrijedna je pažnje i podrške ideja Krnjeušana,

o obnavljanju istoimenog kluba koji je nekada okupljao mlade u ovom uzornom naselju.

U malom fudbalu učestvovala su i dvije ekipe djevojaka. Uspješnije su bile „Kraljice“, koje su nakon izvođenja penala pobijedile ekipu „Rusija“.

Nakon okončanih nadmetanja u sportskim disciplinama nastupila je pjevačka etno grupa MŠŠ „Bosanski Petrovac“, a nakon nje i pjevačka etno-grupa OŠ „Ahmet Hromadžić“. Najboljim u disciplini „natpjevanje“ dodijeljene su medalje: zlatna Biljani Mrđi, srebrna Jeleni Zorić, obje učenice MŠC, a bronzana Anđeli Branković, učenici osnovne škole.

Vedra, nasmijana petrovačka omladina najveći je pokazatelj opravdanosti ovogodišnjeg saborovanja u Vođenici i organizovanja ovakvih manifestacija. Kroz ovo druženje dat je podsticaj našoj omladini, da čuva tradiciju svojih predaka. Bila je ovo i svojevrsna promocija kulturno-istorijskih vrijednosti i prirodnih ljepota bosanskopetrovačkog kraja.

Taj 4. juni ostaće u lijepom sjećanju mladima iz centralnog dijela grada i iz Bukovače, Drinića, Kolunića, Krnjeuše, Smoljane, Suvaje, Vođenice, Vrtoča...



Bilo je „povuci-potegni“ kod učenica osnovne...



...I srednje škole



Bilo je i „mješovitih“ sastava

Prva misa nakon 75 godina

Svetu misu slavio banjalučki biskup Franjo Komarica, povodom 110. obljetnice nekadašnje „župe Bosanski Petrovac-Drvar“

Na svetkovinu sv. Petra i Pavla, 29. juna, banjalučki biskup mons. Franjo Komarica slavio je svečanu Svetu misu na katoličkom groblju u našem gradu. To je ujedno bila prva Sveta misa služena ovdje nakon 1941. kada je ubijen drvarsko-petrovački župnik don Waldemar Maximilian Nestor. Do početka rata ovdje je živjelo oko 1.500 katolika, a u nedaćama rata praktično su nestali iz našeg kraja.

Povod Misnom slavlju bila je 110. obljetnica osnutka „župe Bosanski Petrovac-Drvar“ (1906-2016.), 105. obljetnica osnutka ovdašnjeg katoličkog groblja (1911-2016.), te 75. obljetnica stradanja katolika ovih krajeva.

Uz biskupa Komaricu Misu je suslavio drvarsko-petrovački župnik don Davor Klečina, u prisustvu 100-tinjak katoličkih vjernika iz Banje Luke, Bihaća, Bos. Grahova, Drvara, Livna, te iz Njemačke (Hanover). U odsustvu načelnika Zlatka Hujčića, Općinu

je predstavljala četveročlana delegacija, a prisustvovalo je i nekoliko građana pravoslavne i muslimanske vjeroispovijesti. Bili su tu i politički predstavnici hrvatskog naroda iz USK i Hercegbosanskog kantona.

Na početku Misnog slavlja župnik Klečina dao je povijesni prikaz prisutnosti katolika u ovom području, podsjećajući da je naš grad dobio ime po župnoj crkvi sv. Petra, sagrađenoj 1897. preko puta današnje zgrade Općine, srušenoj 1949. Istakao je da su katolici ovdje prisutni od najranijih kršćanskih vremena, s posebnim osvrtom na srednjovjekovno razdoblje iz kojeg postoje vidljivi ostaci crkve u Koluniću, koji nosi ime po hrvatskom plemenu Kolunića.

Biskup Komarica je u propovijedi istakao, da je dužnost kršćana čuvati čistim spomen na svoju prošlost, bez poticanja na mržnju i osvetu, nego promičući praštanje, mir i suživot. Pozvao je sve vjernike na nasljedovanje Kristova puta, te na izgradnju civilizacije ljubavi i života.

Biskup je zahvalio i petrovačkim nekatolicima na njihovom lanjskom učešću u čišćenju i uređenju groblja, koje je nedavno i ograđeno. Zamolio je da se izgradi manja crkva u kojoj bi

katolici obavljali vjerske obrede i da se obnove neki stari oštećeni spomenici, među kojima svojevremeno uglednoga petrovačkog apotekara Nikole Turića, koji je živio 113 godina (1808-1921.).



Biskup Franjo Komarica i velečasni Davor Klečina u toku Svete mise

Lijepa vijesti iz Zdravkovog Čelareva

U prisustvu mnogih ljubitelja pjesme i pisane riječi, 16-18. juna je održana međunarodna manifestacija „Kočićeve dani“, u Čelarevu, kod Bačke Palanke, na kojoj su učestvovali i predstavnici našeg grada.

Prvi dan manifestacije otpočeo je besjedom o Petru Kočiću, kada su objavljena imena nagrađenih autora najbolje satirične pjesme i satirične priče na konkursu „Kočićevim satiričnim perom“.

Drugi dan protekao je u znaku tradicionalne pjesme „Vračam zavičaju odnijeto“. U prepunoj sportskoj dvorani osnovne škole „Zdravko Čelar“ prisutni su uživali i evocirali uspomene, običaje, tradiciju rodne Krajine i drugih krajeva iz kojih su došli u ovaj dio

Bačke nakon drugog svjetskog rata, uz pjesmu grupa iz Srbije, ali i uz petrovačku izvornu grupu „Drvosječe“.

Posljednjeg dana su održana i takmičenja u običajnim narodnim sportskim igrama, poput bacanja kamena sa ramena, skoka u dalj, navlačenja konopca, navlačenja štapa, varizanja i klisanja...

Održan je i „Zavičajni zbor – kosidba“, u naselju Bukovac, podno Fruške gore, na sremskoj strani Novog Sada. Na ovoj tradicionalnoj kulturno-sportskoj manifestaciji, posvećenoj očuvanju krajiške tradicije i kulture, nastupio je i Mirko Kecman, član delegacije našeg grada; nastupio i – „vratio zavičaju“ pobjedničku kosu!



Mirko je bez premca na „radnom mjestu“!

„Bili su jaki takmaci iz Pljevalja, Rajca, Ivanjice, Smedereva, Ljiga, Batajnice, Bačkog Dobrog Polja... Takmičarski kosim posljednjih sedam godina, i za to sam vrijeme osvojio 20-ak prvih mjesta. Prvu kosu Grmeča, ujedno meni najdražu, osvojio sam pet puta. U Srbiji, na spomenutom Rajcu, na međunarodnom takmičenju bio sam prvak tri puta, a potom i osvojio tri zlatne kose, što je i najveći uspjeh u ovom sportu. I u Sloveniji sam osvojio prvo mjesto. Brojne medalje za prva mjesta svjedoče o pobjedama i na Balkani, Ledincima, Šipovu i širom eks-Jugoslavije. Moj moto je očuvanje narodnih običaja, pomalo već zaboravljenih, od kojih je nekada svaka kuća živjela. Dakle, nastojim očuvati i održati tradiciju naših djedova i očeva koji su dokazali da ljudskim trudom i poštenim radom čovjek savladava prepreke koje mu stoje na putu!“ – s ponosom navodi Mirko Kecman.



Rođen je 15. septembra 1917. u Rašinovcu. Četnici su ga uhapsili, u borbama kod Prnjavora, i strijeljali 10. juna 1942. u Rakovcu, kod Srpcu. Ukazom Vrhovnog štaba NOP i DVJ, Zdravko je 7. avgusta 1942. proglašen za „Narodno heroja Jugoslavije“. Do avgusta 1942. proglašena su 24 heroja, od ukupno 1.322, zaključno sa 1953. godinom.

Zdravko je osnovnu i građansku školu završio u rodnom gradu, potom se upisao na Trgovačku akademiju u Banjaluci i na Visoku komercijalnu školu u Zagrebu. Zbog teških materijalnih uslova, napustio je školovanje, vratio se kući, i počeo raditi kao honorarni nastavnik u građanskoj školi. Politički je djelovao među omladinom, radnicima, „Šipad“-a i seljacima. Na izborima 1938. godine agitovao je protiv režima, i otpušten iz službe.

Aprilski rat 1941. godine ga je zatekao na odsluženju vojnog roka, kod Zagreba. Po okupaciji Kraljevine Jugoslavije, vratio se u Petrovac, gdje zajedno sa ostalim članovima KPJ radi na pripremama za ustanak.

U julskom ustanku 1941. godine Zdravko postaje komandir Štaba za petrovački kraj. Već u prvim borbama dolazi do izražaja njegova hrabrost i organizacione sposobnosti. Prilikom formiranja partizanske čete u Vođenici, Zdravko je postavljen za komandira. Četa je ubrzo postala jedna od najboljih u petrovačkom kraju. Prema prvobitnom planu CK KPJ, u sastav Prve proleterske udarne brigade trebalo je da uđe i jedan krajiški bataljon. „Prvi proleterski bataljon Bosanske Krajine“ formiran je 25. marta 1942. godine, u Čelincu, a Zdravko postavljen za komandanta.

Bataljon je krenuo u pravcu istočne Bosne, s namjerom da se spoji sa Prvom proleterskom. Međutim zbog jačanja četničkih snaga u centralnoj Bosni, bataljon je ostao jedina partizanska jedinica na ovom terenu, izložena danonoćnim napadima

Uz njega, još su dvojica, od ukupno 23 petrovačka narodna heroja, proglašena već tokom NOB: Mahmut Ibrahimpašić Mašo, 1944. (kada je i poginuo, u borbama za oslobođenje Beograda) i Milutin Zorić Garača, 1945. (iste godine poginuo na Sremskom frontu).

Tokom 1941-45. poginulo je čak 16 od naša 23 heroja, od kojih samo dvojica u svom mjestu: Vaso Kelečević, već avgusta '41. u rodnom Oštrelju, doslovno na kućnom pragu, braneći komšinsku

hrvatsku porodicu od četnika, i Đuro Pećanac Đurekan, iz Suvaje, u borbama protiv talijanskih fašista, 5. maja 1942. u Bravsku. Od preostalih 14, osam ih je poginulo u Srbiji, pet u BiH i jedan u Hrvatskoj.

„Petrovački uranak“ u Bačkoj

Zavičajno udruženje „Petrovčani“, u Novom Sadu, i ove je godine upriličilo tradicionalni „Petrovački uranak“, šesti po redu. „Buđenje“ je, uz muziku i pjesmu, igru i sport, ica i piće, trajalo čitav dan, do u noć, u subotu 11. juna, u izletištu Andrejvlje, jednom od najljepših proplanaka u nacionalnom parku Fruška gora.

Pored velikog broja prisutnih Petrovčana, koji su srcem i mislima trajno u svom zavičaju, posebno na taj dan posvećen zavičaju, tradicionalnoj su manifestaciji prisustvovali i službeni predstavnici rodnog im grada. Nakon obraćanja domaćina, prisutnima se obratio i načelnik Općine, Zlatko Hujčić:

„Uvijek sam smatrao da je akcija najjasniji pokazatelj čovjekove misli, o čemu upravo ova tradicionalna manifestacija i svjedoči. Izuzetna mi je čast što sam i ove godine svjedok da ovi vrijedni ljudi nisu zaboravili svoje rodno mjesto, mjesto odakle potiču, svoje običaje, svoja sela, svoj zavičaj. Danas, u ovim teškim vremenima, uspješno se borimo za ono što nam pripada i što zaslužujemo – mi, koji živimo u Petrovcu i, Petrovčani, ma gdje da živite. – riječi su načelnika, koje su prisutni pozdravili gromkim apaluzom.



Ako je suditi po ovim ranoraniocima, „Petrovački uranak“ u Bačkoj ima sigurnu budućnost

Šesti tradicionalni „Petrovački uranak“ praćen je bogatim sportskim programom: fudbal, odbojka, navlačenje konopca, kličak, kao i takmičenjem u košenju. Druženje se nastavilo u veselom tonu, uz pjesme i ples, te ugodne razgovore zemljaka, čije je zajedništvo i saradnja garancija da im zavičaj nikada neće pasti u zaborav.

Petrovački Beograđani poklonili školama računare

Boro Banjac, predsjednik Udruženja Petrovčana koji žive i rade u Beogradu, sa članovima Udruženja Zdravkom Bulajićem i Momiro Kecmanom, te sa načelnikom Zlatkom Hujčićem i predsjedavajućom OV Bobanom Velagom, 3. juna su obišli područne škole u Bjelaju, Bravskom, Krnjeuši, Smoljani i Vrtoču, i poklonili im računare sa pratećom opremom. Namijenjeni su za potrebe učenika.

Nakon uručivanja vrijednih poklona, druženje je nastavljeno u etno selu Čardaklije, gdje im se pridružio i Bogica Petrović, koji je takođe vrlo aktivan član Udruženja. Razgovaralo se o budućim aktivnostima Udruženja i saradnji sa zavičajnim krajem.



S lijeva: Momir Kecman, Bobana Velaga, Boro Banjac, Zlatko Hujčić, Mladen Jević (predsjednik MZ Krnjeuša), Zdravko Bulajić i Marinko Mrđa (predsjednik MZ Smoljana)

Delegati ustajanjem pozdravili izlaganje Jusufa Arifagića!

Posebno mjesto na Kongresu imala je delegacija USK u sastavu premijer Saračević, načelnik Hujčić i investitor Arifagić, povratnik iz Norveške

Osmi kongres Svjetskog saveza dijaspore BiH (SSD BiH), na kojem se govorilo o uspostavljanju jedinstvene državne strategije prema dijaspori (iseljeništvu), održan je u Sarajevu, 3-5. juna, pod pokroviteljstvom predsjedavajućeg Predsjedništva BiH Bakira Izetbegovića i Ministarstva za ljudska prava i izbjeglice BiH. Glavne teme kongresa bile su posvećene uticaju dijaspore na ekonomski razvoj BiH i očuvanje maternjeg jezika i identiteta građana BiH u dijaspori, kroz dopunske škole i kulturne aktivnosti SSD.

Naš kanton su predstavljali premijer Izudin Saračević, načelnik Zlatko Hujčić, te Jusuf Arifagić, povratnik iz Norveške i jedan od najaktivnijih investitora na području USK. Njihovim je prisustvom istaknuta predanost koju USK posvećuje unapređenju saradnje sa dijasporom, koja se očituje kroz brojne projekte i ulaganja naših građana iz dijaspore, kao i povratnika, u privredne kapacitete na području USK. Posljednji primjeri takvog ulaganja su investicije Jusufa Arifagića, vlasnika firme „Arifagić Investment“, koji daje zamah poljoprivedi i stočarstvu USK podizanjem farmi norveškog crvenog goveda na području naše i krupske općine.

Naglasak na Kongresu, koji je okupio oko 150 delegata iz 20-ak zemalja, bio je na stvaranju pravnih i ekonomskih mogućnosti u zemlji, kako bi dijaspora mogla što značajnije na ekonomsko poslovanje i investiranje u našu zemlju. Ministrica Semiha Borovac je tom prigodom održala pozdravni govor u kojem je rekla da se do kraja godine očekuje usvajanje prve Politike odnosa prema dijaspori.

Dosadašnji i novoizabrani predsjednik SSD BiH Hasan Šehović kaže da dijaspora od države BiH očekuje da do kraja godine bude izrađena strategija o iseljeništvu, da budu određene konkretne smjernice odnosa BiH prema dijaspori. „Dijaspora je organizirana putem biznis klubova. Imamo „jake“ ljude, to je potencijal koji treba iskoristiti! Od države samo očekujemo konkretan rad s dijasporom!“ – kazao je i podsjetio da oko dva milijuna bh. građana živi u inozemstvu.

Ministrica za ljudska prava i izbjeglice BiH Semiha Borovac kazala je da je „ovo je prvi saziv državne vlasti koji je dao jasno zaduženje Ministarstvu, da izradi politiku odnosa s dijasporom. To je dosad maksimalan stepen kompromisa u BiH, kad je riječ o našoj dijaspori. Izradom politike odnosa s dijasporom, što se očekuje do kraja godine, želimo institucionalizirati tu suradnju, odnosno staviti našu dijasporu u funkciju prvenstveno ekonomskog razvoja naše države. Drago mi je da već imamo i konkretne rezultate kroz projekte koje Ministarstvo, uz podršku međunarodnih partnera, provodi na planu uvezivanja naše dijaspore sa lokalnim zajednicama.“

„Pitanju dijaspore moramo multidisciplinarno pristupiti u zemlji. Od državnog do lokalnog nivoa neophodno je uvezati relevantne institucije koje će omogućiti da se dijaspora uključi prvenstveno u ekonomski razvoj BiH.“ – naglasila je ministrica.

O ovome, kao i o drugim pitanjima vezanim za izazove u odnosima BiH i njene dijaspore na skupu su u prigodnim obraćanjima govorili Saračević i Hujčić, a naročito zapažen govor imao je sam Arifagić. Njegovu priču o putu od trnopoljskog logoraša, preko izbjeglice u Norveškoj do povratnika i investitora u

svoju domovinu, prisutni su pozdravili ustajanjem i dugim aplauzom. Saračević je naglasio kako je USK kanton poznat po velikoj dijaspori, čiji se kapaciteti mogu i moraju više koristiti. Kantonalna i općinske vlasti moraju biti efikasan servis dijaspori. Vlada



Hujčić je bio jedini općinski načelnik na najvažnijem skupu naše dijaspore sa delegatima

Rašinovac se ubrzano obnavlja

Proširivanjem mreže javne rasvjete, Rašinovac „nikad nije bio svjetliji i večeri u njemu nikad nisu bile prijatnije i sigurnije“

Postavljanjem trinaest rasvjetnih stubova uspješno je proširena mreža javne rasvjete u prigradskom naselju Rašinovac. Podizanjem novih stubova, ukupan broj sijalica povećan je na 96, pa mještani kažu kako Rašinovac nikad nije bio svjetliji i kako večeri u njemu nikad nisu bile prijatnije i sigurnije.

Prema riječima Marizele Ibrašimović, predsjednice Mjesne zajednice, proteklih dana je postavljena i puštena u rad rasvjeta u dijelu koji spaja glavni put i Demire, kao i put od lokalne prodavnice prema Mašićima.

„Zadnjih godina u Rašincu je postavljeno 700 metara novog asfalta, javna rasvjeta je spojila Rašinovac sa Pločom, a postavljena je i na puteve koji vode ka džamiji i Domu. Uz sve ovo, kao možda i najvažnije ulaganje u Rašinovac, to je obnova Doma MZ, koji je zadnjih 20 godina bio prepusten propadanju. Rašincovani će uskoro dobiti

i igralište za djecu pored Doma, budući da se bliže kraju radovi na uređenju.“ – sa zadovoljstvom ističe agilna predsjednica Ibrašimović.

Kako kažu u općinskoj administraciji, uskoro se očekuje uređenje rekreativne zone na izletištu Pečina. Srednjeročno je u planu asfaltiranje puta koji spaja Rašinovac i Krnjeuša, za šta postoje određene garancije od viših nivoa vlasti.



Javna rasvjeta u Rašincu

Najviše se prodaje na kućnom pragu

Dobri počeci plasteničke proizvodnje

Potpisivanjem ugovora o obezbjeđenju prihrane i zaštite, 17. juna, proizvođačima plasteničkog povrća osigurana je garancija da nastave sa korišćenjem plastenika, koji su im dodijeljeni prošle godine. U sklopu proljetne sadnje, Jusuf Arnautović, Milan Čulibrk, Bernard Hukić, Mina Hukić, Sead Kavaz, Nihad Linić, Saša Mrđa, Tanja Obradović, Milan Pečanac, Duško Radošević i Admir Spahić u svojim su plastenicima zasadili papriku, paradajz i krastavac.

Svako od njih dobio je prošle godine po dva plastenika, površine 100 m², sa sistemima za navodnjavanje, prihranom i zaštitom, folijom i ugovorom o otkupu, u okviru projekta „Podrška trajnim rješenjima revidirane strategije za implementaciju Aneksa VII Dejtonskog mirovnog sporazuma“. U sklopu projekta korisnicima je omogućena i stručna pomoć Organizacije Tera-Sana, koja provodi obuke o načinu rada u plastenicima.

Plastenička proizvodnja se povećava i proširuje, na zadovoljstvo građana, a uz organizovan otkup, omogućena je i prodaja na kućnom pragu.



Plastenička proizvodnja paprika...

... i paradajza

Za manje od tri mjeseca

Mladi će završiti tri projekta

Nezbrinuta i djeca s psihofizičkim poteškoćama dobit će igraonicu, u Smoljani će se preurediti tenisko igralište, a u sali MŠC postaviti semafor

Uz podršku Opštine i Fondacije Mozaik, mladi će u našem gradu do kraja septembra završiti tri projekta:

ADAPTIRATI PROSTOR, za izgradnju igraonice za nezbrinuta i djecu s psihofizičkim poteškoćama

IZVRŠITI REKONSTRUKCIJU teniskog igrališta u Smoljani

POSTAVITI SEMAFOR u sportskoj dvorani MŠŠ "Bosanski Petrovac", gdje će se tom prilikom održati humanitarna utakmica.

O tome su u Općini, 30. juna, potpisani ugovori sa trima neformalnim grupama mladih, koji će provoditi odabrane projekte.

Ukupna vrijednost projekata iznosi zamalo 13.000 KM, od čega će Općina i Mozaik osigurati dvije trećine (8.552 KM), a ostatak će se dobiti iz drugih, donatorskih izvora.

Članovi grupa čiji su projekti odobreni preslušali su dva kursa na „M-zoni“, te su učestvovali na

tzv. „turniru društvenih inovacija“, gdje su mladi kandidati (15-30 godina) predstavili društveno korisne inovativne ideje.

Na ovogodišnjih 10 Mozaikovih „turnira društvenih inovacija“ učestvovalo je 900 mladih



Inovativna petrovačka mladost sa predstavnikom Fondacije Mozaik (čuči, u sredini)

iz 150 grupa, iz 40 bh. općina. Najbolji učesnici dobili su priliku da razvijaju svoje projekte u M-zoni Fondacije Mozaik. Iako je prvobitno planirano da se podrži 100 ideja, u M-zonu su pristigle toliko dobre ideje, da je podržano 126 projekata iz 35 općina.

Ukupna vrijednost projekata iznosi 551.404 KM, od čega 312.122 KM obezbjeđuje Fondacija Mozaik od donatora i 25 partnerskih općina i općina, a iznos od 239.282 KM obezbijedile su neformalne grupe u svojim zajednicama kroz mobilizaciju lokalnih izvora.

Radionica za članove vijeća učenika

Nakon radionice, predstavnice UNICEF-a i koordinatorica prisustvovala su konkretnim aktivnostima u Edukativnom centru, koje je provodio predavač za jun, Hazim Tešnjak, trener "Mladosti"

U utorak, 14. juna, u Vijećnici opštine održan je sastanak predstavnika vijeća učenika petrovačkih škola sa predstavnicama UNICEF-a Dženanom Šabić Hamidović i Verom Bartel, uz učešće koordinatorice gradskog Edukativnog centra Bobane Velage. Sastanak je bio koncipiran kao radionica, u vidu druženja, a glavni cilj je bila razmjena ideja oko budućih zajedničkih aktivnosti u Centru, koji se nalazi u prostorijama Doma kulture.

Mladi i najmlađi imali su mnogo toga za reći – dobre ideje, prijedloge, pohvale... A sa njima, takvima kakvi jesu, sve govori

da neće biti problema u realizovanju i provođenju iznesenih ideja.

Još jednom je dokazano da mladim ljudima treba više ovakvih aktivnosti, u kojima će moći da izraze svoju kreativnost, da nauče nešto novo i ono što je najbitnije u današnjem periodu – da se povuku sa ulice! Da se, barem dok su u centru, odvoje od problema 21. vijeka, od koliko zavodljivih još više opasnih društvenih mreža i tehnologije!

Jedna od ideja je bila da se u osnovnoj i srednjoj školi provede anketa u kojoj će se učenici izjasniti oko vlastitog interesovanja

i aktivnosti kojima se žele baviti u daljnjem periodu. Tome će biti posvećen sljedeći sastanak, u drugoj polovini avgusta.

Nakon radionice, predstavnice UNICEF-a i koordinatorica prisustvovala su konkretnim aktivnostima u Edukativnom centru, koje je provodio predavač za juni, Hazim Tešnjak, trener fudbalskog kluba "Mladost".

Predstavnice UNICEF-tima otišle su zadovoljne, i motivisane za sljedeći dolazak, kada će mlade ljude pokušati još više aktivirati, da bi ovdašnja omladina još više osjetila i doživjela Edukativni centar kao pravo mesto za ostvarivanje svojih ideja.



Sa radionice sa predstavnicama UNICEF

Dobra vijest iz Vlade USK Minibus za naše školare!

Na 118. sjednici Vlade Unsko-Sanskog kantona, održanoj 16. juna, donesena je odluka da se „iz sredstva granta za raseljene osobe sufinansira nabavka školskog minibusa za dvije škole, i to u Bosanskoj Krupi i Bosanskom Petrovcu“!

Odluka je jednoglasno donesena, na prijedlog Dragane Bajrić, ministrice zdravlja, rada i socijalne politike.

Sad je na općinskoj vlasti da odredi maršrutu školskog minibusa!

Poruka naših najmlađih sugrađana

„Rastimo uz pjesmu i ples!“

Najmlađi iz „Dječjeg vrtića“ obradovali sugrađane porukama zajedništva, ljubavi, igre, pjesme...



Slušajmo njihove poruke!

Najmlađi i najdraži stanovnici našeg grada, poletarci iz „Dječjeg vrtića“, dobro su razveselili 1. juna svoje roditelje i sugrađane, izvedbom-porukom „Rastimo uz pjesmu i ples!“. Više od tridesetoro djece uzrasta od tri do šest godina uzelo je učešća, sa svojim brižnim tetama, u priredbi istog naziva i sadržaja koja se već treću godinu zaredom održava

u gradovima širom BiH, kako kaže direktorica vrtića Zlata Balić:

„Vrtićka djeca svake godine, u isti dan i sat, u jednakim žutim majicama, uz iste pjesmice i koreografiju, plešu na gradskim trgovima. Zajedničkom aktivnošću je dogovoreno da prvog juna u sedam sati, u svim gradovima Federacije, Republike

Srpske i Distrikta Brčko djeca nastupe na trgovima i odraslima pošalju poruku, da rastu zajedno, uz pjesmu i ples!“

Poželimo našim malim sugrađanima sretno djetinjstvo, uz što više pjesme, plesa i smijeha, i zahvalimo osoblju dječjeg vrtića na krasnoj priredbi koju su nam priredili!

Dječiji vrtić ispratio još jednu generaciju

Stasali u đake prvake

„Svaka generacija je sama za sebe, svaka ona nosi nešto posebno u sebi, pa tako i ova, generacija 2010. koju ispraćamo uz puno ljubavi, entuzijazma i želje da sa sobom ponesu svu onu ‘vrtićku’ sreću u školske klupe!“ – kaže

I ove godine je, 13. juna, Dječiji vrtić ispratio „najstariju“ generaciju polaznika, „zrelih“ za nove životne pohode... To su potvrdili svečanom priredbom, „zaklinjući“ se porukom odraslima „Stasali smo u đake prvake!“ Zajedno su sa svojim učiteljicama iskazali i pokazali samo dio znanja kojeg su naučili boraveći u vrtiću. Odrasli su ih ozbiljno shvatili i uručili im diplome o upješno završenom predškolskom obrazovanju.

Vrtić odgaja i obrazuje dječicu uzrasta od jedne do šest godina, spremajući ih za prvačiće osnovne škole. Tu mališani nauče prva slova, a tete učiteljice prepoznaju prve umjetnike (muzičke, likovne), plemenite ljude, katkad i

izuzetno nadarene... Tu se stvara „ljudski resurs“, koji se daljnjem školovanju samo nadograđuje.

Po riječima Zlate Balić, direktorice Vrtića, predškolski odgoj i obrazovanje je najznačajniji dio psihofizičkog razvoja dječije ličnosti:

„Naš vrtić ima dugu tradiciju, postoji još od 1962. Svaka generacija je sama za sebe, svaka ona nosi nešto posebno u sebi, pa tako i ova, generacija 2010. koju ispraćamo uz puno ljubavi, entuzijazma i želje da sa sobom ponesu svu onu ‘vrtićku’ sreću u školske klupe! Oni zacijelo nikad neće zaboraviti gdje su naučili prva slova i proveli najsretnije trenutke djetinjstva.“

Ovaj vrtić je iznjedrio veliki broj generacija, ali svaku od njih na svoj poseban, emotivan način proživljavamo. Emocije djece nas hrane, nadahnjuju. Osobno sam sav svoj radni vijek provela sa njima. Sretna sam kad odrastaju i kad od te divne djece vidim uspješne ličnosti. Kolijevka odrastanja uvijek ih čeka, gdje se mogu vratiti, vidjeti slike, osjetiti miris, čuti pjesmu, i na trenutak oživjeti najljepši dio svog djetinjstva.“

Ovom završnom, svečanom priredbom djeca su zatvorila vrtićka vrata i otvorila vrata jednog potpuno drugačijeg svijeta, a mi našim mališanima želimo puno sreće na putu njihovog odrastanja.

Izvanredni uspjesi odbojkaša „Mladosti“

Faris Hujić pozvan u pionirsku reprezentaciju BiH!

Puleni Armina Mahmutspahića nedavno su osvojili Kup USK, druga mjesta u kantonalnim prvenstvima seniora, kadeta i pionirki, i proglašeni su za najbolji sportski klub u svom gradu!

Faris Hujić, maturant OŠ „Ahmet Hromadžić“, dobio je 13. juna poziv o kojem je mogao samo sanjati: Nihad Bešlija, selektor muške pionirske reprezentacije BiH u odbojci, uvrstio ga je među 16 igrača, koji će predstavljati našu zemlju na turniru 8 članica Balkanske odbojkaške asocijacije (BVA), 3-7. avgusta, u Ivanjici, Srbija. U našoj grupi su još Grčka, Moldavija i Turska. Sa područja USK pozvan je i Armin Čatić, iz Bužima.

Ovim pozivom odati su velika priznanja i Arminu Mahmutspahiću, treneru Farisove OK „Mladosti“, koja

postupno izrasta u respektabilan klub u BiH. U ovoj ekipi je godinama stasavao i Alen Didović, jedan od najtalentovanijih bh. odbojkaša, koji od 2013. igra u Kataru. Imao je tamo i ponudu da igra u reprezentaciji, ali ju je odbio, igraće za svoju domovinu!

Posljednjih mjeseci „Mladost“ je ostvarila izvanredne rezultate: 5. juna osvojila je KUP USK (ispred ekipa iz Bužima, Bihaća i Ključa), a na prvenstvima USK, seniori, kadeti i pioniri „Mladosti“ osvojili su druga mjesta.

Zbog najnovijih uspjeha, upriličen je 24. juna prijem za predstavnike OK „Mladost“ načelnika Zlatka Hujića, koji je kazao da se mora više raditi na promociji sporta, za što će uskoro biti uređen prostor u zgradi Općine, gdje će biti predstavljeni pehari, fotografije, novinski članci, iz kojih će se vidjeti uspjesi naših sportista.

Načelnik je ovom prigodom najavio veća budžetska izdvajanja za sport, a za odbojkaše će Općina pokriti dio troškova za učešće mladih na trening-kampu u Brčkom.



Sa prijema kod načelnika: Haris je u plavom, drugi s lijeva

Uspjeh mladih Petrovčanki na rvačkom turniru u Beogradu

Djevojčice se okitile sa tri medalje!

Rođen u Krnjoj Jeli, Momir Kecman se sredinom 50-ih, po završetku osnovne škole, otisnuo u svijet, pokupio svjetska odličja u rvanju, osnovao RK „Grmeč“ prije dvije godine i s ponosom predstavio svoje nasljednike na „President Cupu“

Rvački klub „Grmeč“ doživio je vatreno međunarodno krštenje: njegovi mladi članovi predstavljali su 12. juna Bosnu i Hercegovinu na „President Cupu“ u Beogradu, u organizaciji rvačkog kluba „Crvena zvezda“! Oni su imali i svog posebnog domaćina, svjetskog asa u ovom sportu Momira Kecmana, koji je prije dvije godine i osnovao RK „Grmeč“!

Na turniru je učestvovalo oko 600 takmičara iz 50 klubova, koji su predstavljali 15 evropskih država. Za BiH, tj. za „Grmeč“, nastupilo je devet takmičara. Prema riječima trenera Tomice Grbića Bate, naš klub je na ovo

takmičenje otišao „bez nekih velikih očekivanja“. „Ideja je bila da djeca osjete šta je pravo takmičenje i kako to izgleda takmičiti se sa ozbiljnim protivnicima iz Grčke, Rumunije ili Bugarske“ – kaže, ali tri naše djevojčice shvatile su ozbiljno reprezentativni nastup i osvojile tri medalje: Anđela Karanović srebrnu, a bronzane Anđela Grbić i Marija Vranješ!

Ovo pokazuje koliki je značaj ranog uključivanja djece u sport, naročito kad se radi o borilačkim vještinama. Zbog toga će se u klubu posvetiti još veća pažnja radu sa najmlađima. Za to očekuju punu podršku Općine! Biće im

uskoro potrebna, kako bi mogli sticati nova znanja u rvačkom kampu u Beogradu, gdje će imati priliku da uče od najboljih svjetskih majstora.

Rođen u Krnjoj Jeli, Momir je sredinom 50-ih godina završio osnovnu školu u rodnom gradu, da bi se kao njegovi brojni vršnjaci otisnuo u bijeli svijet... U Beogradu je stekao zvanje elektroinženjera, radio je i radi u profesiji, ali najljepše trenutke života proveo je prolijevajući znoj na strunjačama! Stigao do drugog mjesta u svjetskoj konkurenciji, dva puta osvaja medalje na evropskim prvenstvima, učestvovao na olimpijskim igrama, višestruki prvak Jugoslavije...



Rvački klub sa predstavnicima Općine



S našim Momikom, Jugoslavija je 70-ih godina imala najjači sastav (s desna): Boško Marinko, Momir Kecman, Petar Cucić, Josip Čorak, Sreten Damjanović, Milovan Nenadić i Karlo Cović

Važni brojevi u Općini Bosanski Petrovac

Policija	122
Hitna pomoć	124 ; 883-687
Vatrogasci	123
OPĆINA BOSANSKI PETROVAC	883-570

Slušajte Radio Bosanski Petrovac od 15:00-17:00, svakim danom na 90.9 MHz fm